

忠義

目錄

五代南唐

陳喬

元

孔會心

明

練子寧

徐子權

練大亨

涂正

郭裕

正傳共計七名

附編義行



明

鄧元秀

盧朝偉

鄧學禮

鄭宗魯

鄭政瑄

政寬附

饒仲遜

謝仕載

周永緝附

朱禮

聶仕

廖炳陽

黃五倫

劉廣濟

吳輔宗

吳宏義

吳處華

鄧符

曾汝良

聶挺傑

國朝

鄒澄波

周尙禮

黃廷耀

張必達

劉廷勳

正附 共計二十五名

忠義

五代

陳喬字子喬廬陵玉笥人

時新淦屬廬陵

父濟事吳爲翰林學

士烈祖時以兵部尙書卒喬幼穎悟文詞清麗事親以

孝聞濟死撫恤族黨均財給之親疎無閒起家爲大常

寺奉禮卽歷屯田員外卽中書舍人淮南兵興元宗憂

蹙不知所爲陳覺李徵古請以宋齊邱攝政元宗怒度

羣臣必持不可乃促召喬草詔如覺徵古言喬請對未

報排宮門入頓首日陛下旣署此則百官朝請皆歸齊



邱尺地一民非陛下有陛下縱脫屣萬乘獨不念先帝
中興大業之艱難乎讓皇幽囚丹陽宮陛下所親見也
他日垂涕求爲田舍翁不可得矣元宗笑而止引喬入
見后及諸子曰此忠臣也及齊邱黨與皆斥喬與齊邱
尤親厚獨得不坐遷都豫章以喬輔太子留金陵後主
嗣位歷吏部侍郎翰林學士承旨樞密副使遂以門下
侍郎兼樞密使貶制度改右內史侍郎兼光政院使轉
政喬風度淹雅小心守法度然短於才畧吏胥多交通
權倖侮文法不能察也大祖遣使召後主入朝後主欲
往以喬爲介喬曰往必見留如社稷何後主懼見討喬
曰陛下不得已當以臣爲解及兵圍金陵大祖又遣進
奉使江國公從鎰諭指欲後主自歸且命曹彬緩攻以
俟之而喬堅持不可劉澄以潤州降後主方惶惑欲置
其家不問喬憤切曰人臣受重寄一旦開門迎敵此豈
可容悉取其父母妻子斬之於是人皆知喬必死國事
矣及城將陷後主自爲降款命喬與清源郡公仲寓詣
曹彬喬持款歸府投承雷中復入見云自古無不亡之
國降亦無由得全徒取辱耳請背城一戰而死後主握

喬手涕泣不能從喬曰如此則不如誅臣歸臣以拒命之罪後主又不從乃掣手而去至政事堂召二親吏解所服金帶與之曰善藏吾骨遂自縊二吏撤榻瘞之金陵平家人謀改葬求尸不獲或見一丈夫衣黃半臂舉手障面及發瘞如所見云

南唐書

元

孔會心武仲八世孫至元間由經明行修授安慶教授元未守城不屈赴蓮池死贈參軍都錄事

舊志

明

練子寧名安以字行新淦人父伯尚工詩洪武初官起居注以直言謫外任終鎮安通判子寧英邁不羣十八年以貢士廷試對策力言天之生材有限陛下忍以區區小故縱無窮之誅何以爲治太祖善其意擢一甲第二授翰林修撰丁母艱力行古禮服闋復官歷遷工部侍郎建文初與方孝孺並見信用改吏部左侍郎以賢否進退爲已任多所建白未幾拜御史大夫燕師起李景隆北征屢敗召還子寧從朝中執數其罪請誅之不聽憤激叩首大呼曰壞陛下事者此賊也臣備員執法

不能爲朝廷除賣國奸死有餘罪卽陛下赦景隆必無赦臣因大哭求死帝爲罷朝宗人府經歷宋徵御史葉希賢皆抗疏言景隆失律喪師懷二心宜誅並不納燕師旣度淮靖江府長史蕭用道衡府紀善周是修上書論大計指斥用事者書下廷臣議用事者盛氣以詬二人子寧曰國事至此尙不能容言者耶詬者愧而止燕王卽位縛子寧至語不遜磔死族其家姻戚俱戍邊子寧善文章孝孺稱其多學而文宏治中王佐刻其遺文曰金川玉屑集提學副使李夢陽立金川書院祀子寧名其堂曰浩然

明史

徐子權洪武十八年進士授刑部主事與練子寧同榜友善每花底朝回輒相倡和子寧詩所云霧靄爐煙當鳳辰風傳臚唱肅鷓班是也靖難師起聞子寧死從容賦詩曰翹首謝京國飛魂歸故鄉遂自縊以死

明史

練大亨新淦人子寧從子官嘉靖知縣靖難兵入大亨聞變同妻子沉於劉家河方黃齊練受禍之毒載奉天刑賞錄史稱其百世而下凜凜猶生蓋非不恤國事而以一死自謝者可同日語也

明史

涂正字賓賢弘治十二年進士爲諸生時其弟每縱酒
悖慢輒優容以禮遣之分產聽其自擇有女心許友人
子未納采而友卒貧不能以自存竟以女歸之授江陰
知縣政績卓異有循良十詠錢福爲之記治行第一擢
河南道御史巡長蘆鹽課時逆瑾罔利不從憾之會將
代瑾遣人合上羨餘不應入朝遇瑾惟長揖瑾益怒矯
詔下獄廷杖三十謫戍肅州江陰民欲代金活之正不
聽斃於獄瑾伏誅後詔復其官賜祭士大夫悼之作哀

忠錄太史羅洪先爲撰

忠實記

舊志

郭裕字謀貽崇正庚午舉人新淦籍知棗陽時楚氛甚
惡流寇無寧日裕始至寇已破襄陽軍實府矣游騎薄
城下總兵左良玉見賊勢甚盛按兵近邑索餉甚急裕
單騎入良玉營與以誓盟良玉始督戰賊遁壬午復合
兵八十萬襲襄陽將至裕邑裕集精銳死守賊知有備
解去十二月賊將劉福悉精兵萬人攻之裕登陴以死
自誓士皆垂泣殺賊七百人福益治火器盡銳攻之癸
未元日城陷裕身被數槍猶麾將士曰死內舍十餘人
皆死次日福縛裕送闖賊營曰不降寸磔汝裕罵曰堂

堂縣令豈從逆哉賊怒支解之裕以孤城抗賊經年無
援陷沒闔門盡義楚人哀之 襄陽志

贊曰

剥膚赤湛鐵練方黃亦有陳徐異代相望正撼逆瑾裕
死危疆溝壑爲強其亡不亡

原編義士附

道光癸未修輯縣志遵頒發

章程舉報人物義士

縣批入志據呈冊登載

明

鄧元秀初授臨江路總管府判官廉幹有聲覽淦東桃
源之勝遂籍焉性孝友居鄉無閒言更好義急施予嘗
創買祭田數十畝以給俎豆有地名藍溪路當衝要行
者病涉爲鑿烏江之石伐連坑之木獨力造橋五墩計
費不下二千金事上議旌不樂市名固辭垂今往來咸
便焉

廬朝偉好義人也性公直兩目分雌雄有心計先是朝
偉啟土得一刀於窖中元末壬辰兵燹遍天下鄉巨姓

咸推偉守禦固辭弗獲乃提刀斫案曰天既厭亂必生
真主公等欲共守以待有不如令者當如此案衆唯唯
偉法令嚴明劇盜莫敢犯境定住元帥守臨江倚偉保
障無東渡憂會兵逼郡城駐蠡湖偉遣兵夜襲挫其鋒
遂遁去境內賴以安明太祖決戰康山進糧餉洪武二
年追錄前功授爵通侯偉固辭乞老再徵堅辭不就尋
卒

鄧學禮性仗義不局局儔伍中年荒隣里乏食多捐貲
賑貸緩責其償縣令朱嘉其義委修便民倉工費不啻
千餘金身自爲督經營調度悉如式嗣天台王令至復
勸買養濟院田兩臺並加旌獎後舉賓筵晚工岐黃術
恤貧施藥所全活甚衆

鄭宗魯富而好義宣德間江西大祲宗魯助粟二千碩
發賑巡撫上其事詔遣行人賫勅旌爲義民勞以羊酒
仍行有司復其家子政瑄政寬亦克肖厥父正瑄於正
統六年政寬於景泰四年俱以入粟賑飢詔賜旌賞時
稱爲義鄭復有雲甫云

饒仲遜淦西湖田人質性溫雅博覽經史好賢禮士而

樂於施予會英宗之癸巳四方水旱黎民阻飢詔輸穀一千五百石以上備賑者賜勅嘉獎仲遜卽出穀二千二百石郡邑賴之上勅旌義民時東里楊士奇臨陽諸縉紳皆華以文謝仕載周永緝亦同勅旌

吳輔宗景泰癸酉歲大饑出穀二千石輸賑撫臺以其事聞勅賜官帶旌其楣曰義門

朱禮性耿介好古右文景泰初以輸粟賑饑鄉民歲歉多所捐助有司上其義勅賜官帶

聶仕字登明淦北綰湖人少苦力學補邑弟子員敦行孝友崇正乙亥邑廉其行優舉鄉賓晚怡情山水適歲歉捐己橐樂賑窮乏里平咸德之

廖炳暘新淦長簿人其先世常出粟與興義倉炳暘賞益殷盛樂施予克紹先志給濟凶荒鄉里賴之當道具聞於朝降璽書旌焉

黃五倫黃善正統天順間父子出粟助餉賜職文林郎奉敕褒獎

劉廣濟正統五年賑饑子璇魁助餉征楚賜職建坊周擇善周大寧周行勉明景泰四年出穀賑饑恩旌義士

劉恒迪家貧明季樵採樂安龔惠姑遺金僻地恒迪拾得坐待還之

吳宏義吳處華吳濟庶于明代助餉濟饑均授七品冠帶舉鄉飲大賓

鄧符宣德乙卯歲郡邑饑出粟二千石賑濟奉敕旌表義行

曾汝良萬曆己卯山東饑助粟備賑奉敕建坊旌表義行

聶挺傑正德十六年爲糧長代賠欠逋撫軍陳獎以善蓋一鄉匾額

國朝

鄒澄波嘉慶二十四年捐田糧一石貳斗入金川書院以助膏火

職員周尙禮乾隆二十三年捐穀三百石入社倉

張必達乾隆二十八年捐銀百兩助修城垣

生員黃廷耀乾隆二十九年捐銀三百兩助修城垣議敘八品給仗義興仁匾額

劉廷勳國學生一都社裏人家業中產遇貧苦親隣偶

有偏災輒量力周卹由家抵縣二十里與兄元勳協力
 修砌石砥以濟行路廷勳抱疾囑其子維垣勉事詩書
 遵遺言捐庄田以助金川書院膏火價值千金道光甲
 申隣族紳士舉報義行縣侯宋批云廷勳好義樂施資
 志以逝積善傳家允堪嘉尚候詳請旌獎庄田契價另
 詳書院志膏火條款中錄詞存徵

據呈册新編

孝友目錄

晉

留京

南唐

周斗南

宋

張仲友 郭抃 江偉 張文 李仲發

馮辰郎

彭紉孔附

蕭大臨

蕭大受附

元

新修縣志 卷三十三 人物 孝友六 一
何祐 蕭伯原 蕭仲倫 蕭漢卿附 盧勝

明

宋貴祥 宋 常附 袁辛 袁克己附 袁吉祥

黃賢 胡進用 干顯德 黃流 干鳳

鄒深 胡堅 饒思鄒 彭錫命 吳龍

鄧桂 王舜道 鄧國材 鄧國正附

正傳二十八名

附傳七名

共三十五名

孝友

晉

留京臨江人孝行推於鄉里時江水暴漲居民皆遭漂

溺京負其母號泣忽有大龜至其前舉家七口俱上龜

背行十里許及一高岸遂失龜 九江記

通志跋云晉時未有臨江郡名留京事林志不載然豫

章書引九江記以留京為晉人必有所據今時代既不

可詳姑仍豫章書補人之

南唐

周斗南字彥強少俊邁屢舉不第中年讀內經有得遂
無意仕進家貧教學以供甘旨有餘則以給其弟或勸
之仕乃勉赴廷試得大庾簿奉母就養至贛以疾卒人
咸惜之

舊志

宋

張仲友元祐間人父業醫早卒仲友世其業事母至孝
人稱張孝子鄉先生宋玘爲之作傳劉仲叟書於戲魚
堂

舊志

郭抃幼失怙建炎間寇賊四起所至焚殺獲女婦輒拷
掠索窖藏否則殺之抃母爲盜所執抃泣哀求以身代
賊憐而釋之部使者請旌於朝會中原多故未報後每
遇大禮賜赦郡縣舉舊典封護其墓尙書張頴爲作孝
子傳

舊志

江偉字彥明

舊志偉新淦人
永新志偉作暉

喜作詩事母盡孝母疾進

藥之餘攜筆硯坐床下吟詩自遣與俞師郝處俊友善
崇寧大觀間吉守嘗以八行薦於朝不報自號轅陽居
士處俊登建炎乙科而彥明晚春詩有云鬪草事空猶
昨日惜花心在又明年其詞意亦婉美江俞兩人酬唱

新淦縣志 卷三
甚多新淦永新志並載其事殆以爲廬陵新淦耶 獨醒

雜志

張文字堯冕事母孝所著有易經五贊解四書發明西

洲稿 舊志

李仲發新淦人幼孤事二母俱孝紹興甲寅生母侯氏
病革割股肉手熟以進母啜之愈有橘產於庭二木合
幹人謂孝感所致誠齋楊萬里爲匾其堂曰橘瑞良齋
謝諤記之侯氏歿誠齋題其墓曰李孝子生母侯孺人

墓 舊志

馮辰郎新淦人年十四刲股救其父彭細孔刲股救其
母悉聞於朝二人皆淳祐初事 舊志

蕭大臨大受兄弟幼失怙躬行孝弟事大父慈母色養
家事大臨獨任不私蓄者三十年大受受室始終不析
爨楊文節公萬里題蕭端虛和樂堂詩云玉筍風回峽
山雨兩公對牀方軟語少公一生吟樣癯長公半醉少
公扶白頭兄弟不多有面如橘紅不關酒紫荆花開連
理枝孝友未要時人知至今里人尤談其事 楊誠齋集

元

新淦縣志 卷三
何祐新淦橫溪人兄弟四人翁然和樂孝於父母祐自
少不羣力學好遊覽奇勝自江涉淮歷齊魯以達遼海
若有所得祐父士端工於醫敬賢尚義教諸子以學文
存心澤物人以爲積善之報 金文靖集

蕭伯原性至孝守父喪盡禮以蔭授宣義卽爲泰和縣
丞時金兵壓境官屬解散獨伯原不懼郡守嘉其忠命
署縣事旣得代因過泰和桃源愛其勝家焉後子仲倫
舉於鄉四世孫漢卿膺薦爲寧州學正以謙謹簡默率
諸生鄧侍郎光薦稱之其裔在泰和多顯者 舊志

盧勝字紹先新淦殷山人資稟敦實讀書通大義元末
兵擾間關養親時遠近方事焚劫盜感其孝戒勿犯其
廬隣里亦賴以粗安兄弟三人怡然友愛伯兄歿於外
事孀嫂以禮爲擇後承祭開塾延師訓子弟僮僕皆有
方法口不言人過人有爭溫言解慰或加以非禮笑不
答有急難假貸不能償者無所較鄉里咸以長者目之
子滋字玉潤以薦授吏部主事歷官杭州知府以廉勤
稱 金文靖集

明

宋貴祥字惟學新淦柘鄉人先世出自丹陽有名詢者爲袁州刺史秩滿道經新淦遂家柘鄉貴祥幼孤性謙謹篤學好義家庭之間藹然禮讓之風好遊覽常買舟泝大江逾淮泗以至齊魯南涉衡湘西抵隴蜀洪武中以耆年舉遂至京面謁太祖錫以宴勞遣還貴祥事母王氏至孝元季兵興父客死於外貴祥日夜哀號卒獲父骨歸葬每與人言輒嗚咽不禁見者爲之感慟孫常以易經登永樂戊戌進士

金文靖集

袁辛字煥南新淦沙坊人美姿容幼敏力學家居父子兄弟自爲師友父以仁高年爲鄉里推重辛朝夕侍婉愉承顏得其歡心季父克己以才薦仕爲河間府稅使改臨安宰靖州南北遷調辛扶持之勞爲多時朝廷方營建北都詔取大木邑大夫檄賢豪任其役辛率千人入險阻冒風濤以進舟至新淦白馬灘疾忽作子吉祥侍側呼之曰疾弗起矣宜自立母忝所生

金文靖集

袁吉祥新淦玉峽人父辛弟吉榮吉華吉信吉瑞妙年美質卓有立志弟兄優游究心六藝勤於揖讓肅教敦禮宗族享祀必謹必恤忿疾之言不出於戶鬪訐之聲

不聞於室與金幼孜爲媼連稱其居有華屋衣有美服
有僮僕給使令有田園供伏腊有煙霞泉石供嘯傲所
以適心情快耳目者無一不得而勉以君子所性修之
於己爲仁義禮智行之於家爲孝弟忠信致謹於日月
常行之間防慎於幾微幽獨之際不可使須臾以乖於
道此則士君子所當致力而不敢忽者既協之琴瑟填
箎以重倫而厚誼益進以日積月累以承先而啟後吉
祥兄弟安享悠久之福以瀟灑太平之澤者非無所自
而然也 金文靖集

黃賢字仁律德淵孫正統間貢士教授荊州端已率物
課士先實行而後文藝學侶嚮風在官踰年以母老乞
歸孝友廉潔表正率鄉閭迹其恬淡殆善承祖武云 新編

胡進用新淦中洲人父懋功祖厚德俱蚤逝祖母曾母
聶矢志撫孤進用鞠於曾事母盡孝每念及二親淚則
涔涔下見者悲之進用有才而賢與邑先達周虛白訂
忘年之交情孚意合稱其德義之全不獨文章之俊構
篁翠樓環攬中洲之勝其所著篇什冲澹清妍日進於

善 東阜集

干顯偲有至性甫六歲父敷柔卒事母陳氏孝養若成人母病籲天以祈身代湯藥必親頃不離側母卒哀毀幾滅性朔望時祭必至墓拜哭雖疾弗輟提學邵寶特加存問且歎其能盡養盡哀宏治間旌表舉入江右名

賢

舊志

黃流新淦人早喪父其母患噎疾醫弗効日夜禱於神求以身代一日母思米果卽有隣人餽之者食之遂愈流往稱謝隣言初無是餽人以爲孝感所致淦之言孝

孝行者以干黃竝稱云

林志

干鳳字宣治性至孝父母卒哀毀廬墓三年宏治甲子舉於鄉登正德戊辰進士乙榜授高淳諭誨諸生以行業名節相砥礪出俸錢以供祭器尋以憂歸服闋補合淝清白自矢病危大守廉其貧遺之金使治後事不受尋擢桃源令命下而卒合淝諸生爲立遺德碑祀於學宮正德嘉靖中祀鄉賢督學使邵銳乃命建坊表其宅

舊志

鄒深字維淵新淦塔峯里人宋銀青光祿大夫望龍之

後父廷偉深生而剛直治詩遊邑庠後之安成

即吉水受

春秋於趙司空窮探苦索卒領其旨督學范公試士首

列深召之坐講經義欲奪一生原饒與之深以義辭五

試不第杜門不復干進正德辛未流寇壓境深侍父避

山中賊得其父又加其頸深大哀號願以身代懷金求

贖賊義而釋歸督學李夢陽聞之大加嘆賞士大夫咸

詠歌其事父歿事母益謹與弟維源共理家政出納公

謹友愛不替當時謂深績學不第安於義命完親以歸

誠能動物可云有道之士矣

秉器集

胡堅號南汀幼失怙奉二母以孝聞由貢監授山東濟

寧衛經歷所至軍民懷之以內艱歸鼎修宗祠重刻先

集與同邑朱璉劉正亨爲觴咏友因題其諸祖塋墓卜

厝於武溪之傍年八十二卒二人爲之豎立枋表撰文

勒石以彰厥德焉

舊志

饒思鄒字克紹邑西湖田人幼孤奉母守節寄居外家

孝弟力學伯舅識爲館甥家人避季舅疫思鄒獨躬親

殯事而均植其後嗣應隆慶丁卯選貢就南平訓導却

金不事請托諭羅田雪士寃其人遂獲備選令湖廣新

寧擬調大邑百姓保畱乃止復徭徭侵田數千畝立新法汰浮糜得序餼者七人出死刑講軍實甦困民清丈冊詳載旌賢祠記畱任七載致政歸屬其後曰畱餘舊志

彭錫命字君寵淦北甘泉人中萬歷壬午鄉薦丙戌登進士家貧嗜學少有才藻尙大節誘進後學以成名賢事二親尤以孝聞外祖官學博舉嗣最晚先遺母田數十畝學博殂子甫半葑亟請於母以田還之撫植過於已子讀書清江山寺中見枯骨及塚崩者捐貲爲之蓋

藏既鄉舉益杜門讀書謝絕干謁修葺宗祠旋登科甲內閣許國獨器重之稱爲榜中杰士爲具疏爭儲位許閱其稿益歎不已值暴疾未上館選卒舊志

吳龍字永卿邑庠生父早卒事母張氏以孝聞母常危疾不療籲天祈代夜夢神告醫姓名求得之果效後數年母卒結廬塋側感蛇虎之應大史羅洪先作原孝嘉之事聞旌其閭舊志

鄧桂性篤孝嘗廬墓山中墓側有山叟慕其孝挈子往候道值虎攫叟子於山巔鄧聞籲天曰若衰年僅一子

以我故而罹虎傷是我之罪也虎遽搖尾馴服遂釋之
舊志

王舜道力學甘貧親終廬墓適天旱山澗絕流病不能
汲因掘地泉應手而湧人以爲孝感事聞旌其閭
舊志

王秉節幼孤力孝母病籲天請代割股肉和藥以進母
旋瘳邑令曾聞之學使給衣巾歲賜粟帛
舊志

鄧國材邑庠生父病將革遂刳肝和粥以進秘不言忽
有道者持藥造門日以療孝子隨去不知所之事聞有
司召詣府驗視咸大嗟異後廬墓復有馴虎守其旁山

無居鄰一日爲盜所縛忽山谷響應縛盡釋兄國正亦
嘗割股愈父疾兄弟雍睦無間有司顏其門曰力行篤
孝
舊志

讚曰廬墓爲禮守身示教割股臥冰母乃愚孝舜道泉
湧吳龍神詔蕭氏弟兄醉吟扶笑

附編孝行

國朝

鄧榮綬 習開泰 楊烈 彭澤 王維綸

朱尙禮 楊國楣 周廷訓 周廷樛

共計九名

新編孝行

道光癸未修輯縣志遵頒發

章程舉報人物孝行

縣批入志據呈冊登載

從九品鄧榮綬四都 圖東郭人道光癸未年編輯縣

志族人及廩生監生洪遠照朱人傑鄧克結報孝行邑

侯宋批核實入編據詞云鄧榮綬承懽色養友愛情怡

父在母亡兄終弟歿成兩嫠之節以待

旌表修橋道以利人行出積穀以資歉助貧婚掩遺骼碑

銘有載錄詞存徵

鄉飲習開泰五都十一圖習坊人道光癸未年奉

部文編輯縣志族隣及歲貢廩增附生李元騃鄭元杰

彭文運朱克剛結報孝行邑侯宋批核實入編據詞云

習開泰生甫一歲而孤屈身為人食牛乃能求師講貫

力穡濟旱母疾嘗痰

施聖金神

獲佑

表率刑於妻沈氏同心克孝

錄詞

存徵

生員楊烈三都一圖水口人道光癸未編輯縣志族鄰

及廩貢生裴德治曾飛熊李璇鄧九德李克己易之晉

鄧化行陳德元劉紹業張綸結報孝行邑侯宋批核實

入編據詞云楊烈重念同胞讓名讓財謹遵遺命孝友

足為里黨式錄詞存徵

增廣生彭澤五都十三圖人道光癸未編輯縣志族隣

及貢廩增附生彭龍春董効忠周鳳翹彭藻結報孝行

邑侯宋批核實入編據呈詞云彭澤九齡無母生忌必

祭居喪瘠毀嘔血絕而復蘇繼母哀兒視作田耕以共

甘旨舌舐母瞽目復明召弟嚙指為書勵貞完弟婦節

周氏獲刑孝養克謹錄詞存徵

贈修職郎吉水縣教諭周家梁六都九圖梅溪人道光
癸未編輯縣志族隣及廩增附生黃文綸陳寶書謝汝
霖結報孝行邑侯宋批核實入編據詞云周家梁幼年
失恃哀苦成人孝事繼母誠心感召化虐爲慈育兩弱
弟三十年同居一家三世教養弗衰修城建學捐金三
百餘錄詞存徵

增生王維倫三都大車里人道光癸未修輯縣志甲申
邑紳士裴德車裴啟泰陳化楊昶姚翀漢鄧體學陳祚
輝龔學海周鳳翹徐士奇公舉孝行時維倫已前歿邑

侯宋批准發局核輯按維倫九齡無父哭泣躑躅如成
人事母卽知溫清定省之節受室以後道婦偕行孝敬
跬步頃刻不忘稟承訓徒負米念切瞻雲賓筵宴會舍
肉懷橘綽有古風中年失偶母每歲製二履遺之維倫
跪拜著履拂塵雅步俯視欷歔年雖衰老三年大比猶
應鄉試以冀顯揚其篤行可風錄詞存徵

朱尙禮四都

人道光癸未修輯縣志族隣及貢生

楊勲生員朱應龍朱必明結報孝行邑侯宋批准發局
查明入志據呈詞朱尙禮六歲喪父時順治元年鄉里

未靖隨母避寇比就塾師講弟子入孝出弟章歸而爲母解說自云人皆有父我乃獨無輒爲涕出母子感傷母病瀕危醫者言需指爪入藥尙禮卽割一指和藥以進母獲壽九七而終事關倫紀歷久名存據錄呈詞存徵

王簿楊國楣六都坑口人道光癸未編輯縣志甲申族隣及職員貢廩生裴德車陳祚墀周鳳姿楊日哲劉凝春結報孝行署縣侯何批准入編事實存案據詞云王簿楊國楣係遺腹所生善事寡母終身如一居處莊敬願減算以益親能分金以潤姊形聲直求之杳微敬順不懈於生死孝行可嘉風化攸關錄詞存徵

鄉飲周廷訓六都武湖人道光癸未編輯縣志甲申族隣及職員廩貢生陳權楊日曙傅志南結報義行署縣侯何送局核辦趕載入編據詞云周廷訓年二十九歲失偶不娶節義性成弟歿姪幼課姪入庠建修家祠橋道義井排難好施終身不二色人高其義可勵風化錄詞存徵

周廷楞六都九圖穆湖人道光癸未年編輯縣志族隣

及職員廩附生聶映斗劉孝湘陳寶書吳毓英饒銘結
 報孝行邑侯宋批核實入編據詞云周廷楞父歿守塚
 三年服勞致祭代父教弟得就功名施蓄義穀倡立祭
 田錄詞存徵

書目 附人物志後

唐

唐書統一百卷 陳岳著

吳錄二十卷 陳審著

老圃集 俞處俊著

宋

清江集五十卷 孔文仲著

詩書論語

金華講義

易經五贊解

四書發明

西洲稿 以上張文著

內外制雜文共百餘卷 以上孔武仲著

續世說釋解 孔平仲著

上金集 謝舉廉著

新舊官制通考十卷

通鑑通釋二卷 以上曾三異著

南北籌邊八十卷

蒙史 卷 以上曾三英著

南宋

北窻集 鄒惇著

書史素臣

集句三百首 以上郭應龍著

存存齋稿三十卷

存存齋記三卷

擬志林十卷

藥問五卷

因話錄十卷

閉戶錄三卷 以上曾三聘著

少陵句外 曾季輔著

思賢堂法帖三十卷 蕭建功著

元

桃源漁唱集 龔舜咨著

輔星集 鄒幼亨著

明

玉屑集 練子寧著

退軒集 張徹著

頤庵集 胡儼著

性理大全 吳嘉靜著

北征集

金文靖集 以上金幼孜著

澹庵歸樂集 陳孟浩著

鳳筠詩集 鄒誨著

書經講說 張敬著

梅溪集 潘邃著

靜齋集 何衷著

備遺錄

歉齋奏議 以上張芹著

紅塵稿

四還餘訓 以上蕭克良著

秉器集 朱孟震著

五有堂集 朱璉著

活幼心法 聶尙恆著

南齊政紀 張佩著

雲泉集 吳遠著

渡湘漫稿 饒鳳詔著

樸庵集 胡器

五經膚見

四書訓註 以上張敬著

三書附註

史說獨言 以上朱泗著

四書詩經補意

續史日抄 以上朱家懋著

浪遊吟

山陰會語 以上饒崇嶽著

詩海珊瑚 黃桀著

理學類編

羣書備數

元史節要

吾樂山房稿 以上張美和著

冰壺集 宋義著

天地自然圖

太極圖說

雲邱子集 以上蕭子鵬著

國朝

緣天稿 熊僕著

易學探微 李作相著

知稼軒集 王泰牲著

慈訓篇

待月詩詞 以上王雲翔著

政草編 劉世寧著

竹居集 孫之鳳著

次沙集

雲樵話答 以上陳希猷著

一盤珠 洪金鼎著

新淦縣志卷二十三

流寓 目錄三十二名

吳

虞翻

晉

陶侃 羅含

齊

蕭子雲

梁

蕭 勵

唐

崔國輔 權德輿 方 干

南唐

周 本

宋

劉次莊 黃庭堅 孫 覲 岳 飛 朱子

楊萬里 戴復古 文天祥

元

劉 詵 傅若金 何 中 吳 澄 周以立

郭 珏

明

梁 寅 常遇春 劉永之 解 縉 羅洪先

楊廷麟

國朝

王士正 查慎行 黃 慎

新淦縣志卷二十三

流寓

通都大邑富貴利達者萃處焉然生前赫赫歿而姓氏無聞者十八九矣獨賢人君子所駐足雖窮鄉僻壤一邱一壑當時榮之後世思慕之人貴自立豈不信哉淦當孔道兼有棲碧石洞諸勝故其地多古人遺跡理學如朱考亭吳草廬將畧如岳武穆忠節如文信國經濟如虞仲翔陶士行風雅如蕭景喬劉次莊黃魯直楊誠齋其尤表著者後之覽者能無高山

景行之思乎作流寓志

吳

虞翻字仲翔孫策征會稽翻衰經詣府門命爲功曹待以交友之理策薨權爲吳王歡宴之末自起行酒翻陽醉不持權大怒手劍欲擊之遂徙交州道豫章時新淦屬豫章聶友爲縣吏令使友送之翻與語而奇焉書與大守謝斐令以爲功曹斐見之問友可堪何職或以爲小吏可堪曹佐斐用爲功曹友由翻而知名

吳志

晉

陶侃字士行鄱陽人徙潯陽舉孝廉屢平叛亂立匡復大勲歷官大尉都督八州封長沙郡公薨謚曰桓初侃父丹娶湛氏生侃湛新淦人今清江鎮也丹卒侃幼家貧依母居外家母紡績資給之使交結勝已嘗釣於水中得一織梭以懸於壁一日雷電起梭化爲龍去後人立亭表之今清江鎮瀕江有化梭古徑是其處也名勝志云府城東北三十里有化梭亭晉士行故跡也又云郡東門百花洲相傳晉陶侃讀書處

晉書

士行貧時冬日母子嘗著敝葛及貴母恆於公服裒口

內縫一片曰女當作佳官盡心恤民毋忘著葛衫時也
奚囊橘柚

羅含字君章桂陽來陽人父綏榮陽太守含幼孤爲叔
母朱氏所養少有志尙嘗晝臥夢一鳥文彩異常飛入
口中因起驚說之朱氏曰鳥有文彩汝後必有文章自
此藻思日新弱冠州三辟不就含父嘗宰新淦淦人楊
羨爲含州將引含爲主簿含傲然不顧羨招致不已辭
不獲而就焉及羨去職含送之到新淦淦人以含舊宰
之子咸致賂遺難違而受之歸悉封置而去由是遠近

推服謝尙與含爲方外之交稱之曰羅君章可謂湘中
之琳琅桓溫臨州又補征西叅軍溫奇其意目爲江左
之秀不獨荆楚而已後轉廷尉長沙相年老致仕還家
階庭忽蘭菊叢生人以爲德行之感 晉書

齊

蕭子雲字景喬高帝孫善草隸自云效鍾元常王逸少
而微變其體出爲丹陽太守百濟國使人至建鄴求書
逢子雲爲郡維舟將發望船三十許步行拜行前子雲
遣問之答曰侍中尺牘之美遠流海外今日所求惟在

名迹子雲停船三日書三十紙與之獲金貨數百萬後徙家都木坑隱洞中不知所之

南史

梁

蕭勵字文約武帝從父弟吳平侯景子也襲封吳平侯遷豫章內史道不拾遺男女異路徙廣州刺史去郡之日吏民悲泣數百里中舟乘填塞各齎糧食以送勵勵人爲納受隨以錢帛與之至新淦圻山村有一老姥以槃粢鮓魚自送舟側奉上之童兒數十人入水扳舟或

歌或泣

南史

唐

崔國輔吳郡人開元中應縣令舉授許昌令累遷集賢直學士禮部員外郎後坐事貶晉陵司馬楚水吳江孤客宦遊宿新淦法華寺詩尤爲超詣春江楊柳水綠山青所云遊宦常往來津亭暫畱憇者則自法華歸南昌驛館之辭也

全唐詩

權德輿字載之天水畧陽人德宗聞其材召爲大常博士改左補闕兼制誥中書舍人歷禮部侍郎元和初歷兵部吏部侍郎拜禮部尙書同平章事罷以檢校吏部

尚書畱守東都出爲山南西道節度使二年以病乞還卒於道年六十謚曰文德與奉使宜春渡新淦江路遇風雨至黃蘗館宿焉所云轉知人代事纓組乃徽束何若家居時安枕春夢熟者

唐書

方干字雄飛新定人貌甚卑陋咸通中一舉不得志遂遯會稽漁於鑑湖大守王龜以其亢直宜在諫署欲薦之不果行干自咸通中早得文譽迄於文德之代推爲老宿大江以南一時稱詩無有能及之者干歿之後又十有餘年宰相張文蔚乃特奏名儒不第者五人請各賜一官以慰其身後之魂魄干其一也干有題新淦王笥山強處士詩一首載於集中

全唐詩

南唐

周本舒州宿松人漢周瑜之後吳武王起隸帳下勇冠三軍每先登摧鋒戰罷輒自燒鍊烙其創武王取江西撫州刺史危全諷爭其地屯象牙潭起本馳擊之擒全諷吉州刺史彭玕鎮工嶺地在吉水蘭溪本駐師新淦據烽火磯築城以圖玕玕勢孤援絕遂奔馬殷而吳盡有江西之地

南唐書

宋

劉次莊字中叟熙寧六年賜同進士出身以開梅山入洞曉諭得官仕至侍御史江西漕使謫臨江新淦居東山號戲魚翁嘗摹淳化閣帖十卷刻石置堂中又自爲法帖釋文十卷與武岡帖潭帖並傳

舊志

黃庭堅字魯直洪州分寧人舉進士爲葉縣尉又爲國子監教授蘇軾見庭堅於孫覺之坐異之李常於濟南見其詩文以爲絕塵獨立萬物之表由是聲名始震知太和縣又監德安鎮召爲校書郎爲神宗實錄檢討官

逾年爲著作郎服除除秘書丞紹聖初議者以實錄失實謫涪州別駕黔州安置移戎州僉判寧國軍知舒州召爲吏部員外郎丐郡得知大平州坐除名編管宜州卒年六十一初元豐三年庭堅由吏部改官得知吉州太和縣途經新淦時何蕭二族爲淦之冠庭堅詩云西漢功名相國多南朝人物數諸何上蕭家峽玉笥山都木坑子雲宅愛其山明雪淨有玉笥峯前幾百家荷蓀歸來有蕨芽之句

山谷外集

孫覲字仲益常州人政和間進士第五歲卽爲蘇軾所

器靖康俶擾爲執法轉詞臣歷吏戶連守大邦紹興初
謫居象郡歸大湖二十餘年孝宗朝命編類蔡京王黼
等事實上之史館年九十餘卒覲爲向子謹撰香林記
由崇仁趨新淦凡四夕一寓道觀三止僧舍三山寺詩
云異縣久爲客窮途飽所更題峽江蕭氏庵云客路三
年過僧窻一笑譁嘗提舉鴻慶官所著有鴻慶集誠有
宋之作家也

鴻慶集

岳飛字鵬舉相州湯陰人少負氣節家貧力學尤好左
傳春秋孫吳兵法生有神力挽弓三百斤弩八百學射

於周同盡其術宣和四年應募擒陶俊賈進和康王至
相州因劉浩以見補承信郎畱守宗澤大奇之康王卽
位居故職借補英州刺史授眞州刺史兀朮趨杭州飛
要擊六戰皆捷紹興元年張俊請飛同討李成大破成
軍功第一加神武副軍都統制畱洪州三年春虔吉盜
連兵寇掠飛至虔州道出新淦駐新修寺有題壁詩

宋史

朱子徽州婺源人父韋齋中進士第除秘書省正字朱
子幼穎悟甫能言父指天示之曰天也因問天之上何

物父異之授以孝經一日題其上曰不若是非人也從
羣兒戲沙上端坐以指畫沙視之八卦也年十八貢於
鄉中紹興十八年進士第主泉州崇安簿選邑秀民日
與講說聖賢修己治人之道淳熙元年除秘書郎五年
除知南康軍訪白鹿洞書院遺址爲學規俾守之二年
除直秘閣改提舉浙東常平茶鹽公事單車就道所部
蕭然遷江西提刑未行遂歸乞奉祠時鄭丙上疏詆程
氏之學且以沮朱子監察御史陳賈首論道學假名以
濟僞十年差主管台州崇道觀奉祠五年除兵部郎官
直寶文閣崇政殿說書光宗卽位再辭職仍舊直寶文
閣改知漳州差知潭州寧宗卽位趙汝愚首薦之除煥
章閣待制侍講時朝廷大權悉歸侂冑監察御史沈繼
祖誣以十罪落職罷祠自以年七十乞致仕五年依所
請明年卒年七十正坐整衣冠就枕而逝子壻黃幹爲
新淦令朱子手書牧愛堂懸之廳事有詩云南市津頭
問買舟金川皂嶺之間山高而水長古大儒往來之地
百世長思烏可不誌也

宋史

楊萬里字廷秀吉州吉水人中紹興二十四年進士第

爲贛州司戶調永州零陵丞時張浚謫永杜門謝客萬里三往始見之浚勉以正心誠意之學萬里服其教名書室曰誠齋改知奉新縣大治遷太常丞轉將作少監出知漳州改常州擢東宮侍讀出知筠州光宗卽位召爲秘書監出爲江東轉運副使改知贛州不赴乞祠除秘閣修撰提舉萬壽宮自是不復出開禧元年召復辭韓侂胄柄國臥家十五年家人不敢進邸報時政皆不以告忽族子自外至遽言侂胄用兵事萬里痛哭失聲呼紙書曰姦臣專權謀危社稷吾頭顱如許報國無路惟有孤憤別妻子落筆而逝年八十三萬里與蕭氏兄弟善稱其白頭孝友吟樣清癯和樂堂賦詩飲酒往來爲歡又與曾三異爲詩友其退休也有和三異作云與子兩人長對酌笑渠萬古浪垂名簞笠尋盟亦詩壇之

韻事

宋史

戴復古字式之父敏求天台黃巖人居南塘石屏山因以自號少孤篤志於學登陸放翁之門詩法益進游歷甚廣以詩鳴江湖間與曾三異蕭端虛諸人相酬贈往來清江玉筍之間詩云玉筍千峯雨金風十日秋故人

歸未得我亦爲詩畱之句石屏佳句如綠深楊柳重紅
透海棠嬌綠漲春前水青開雨後天簷榭雙燕語風雨
百花殘客游兒廢學身拙婦持家夜深風動竹人靜月
當樓殊鍛鍊琢削歸於自然

石屏集

文天祥字宋瑞又字履善吉之吉水人自爲童子時見
學官所祠鄉先生歐陽修楊邦乂胡銓像皆諡忠卽欣
然曰沒不俎豆其間非夫也年二十舉進士第一考官
王應麟奏其卷忠肝如鍊石爲得人賀元兵伐宋詔天
下兵勤王召入衛語及時事輒流涕撫几言曰樂人之

樂者憂人之憂食人之食者死人之事衛王立加少保
信國公趨五坡嶺被執吞腦子不死護送至京師終不
屈臨刑殊從容年四十七其妻歐陽氏收其屍面如生
天祥於淦曾叔仁爲姍戚序青雲魁星約稱新淦風土
之賢言流寓於淦者得周急之助又與季輔友善稱讀
杜詩奉教於北山子可爲此土之光矣

宋史

元

劉詵字桂翁廬陵人九歲宋亡年十二作爲科場律賦
論策之文蔚然有老成氣象宋之遺老一見卽以斯文

之任期之御史蕭方厓尙書鄭鵬先後以教官館職遺
逸薦皆不就至正十年卒年八十三所著詩文曰桂隱
集嘉靖間重爲鈐梓太史羅洪先爲之序詵與新淦饒
自然往來寢處城頭塔寺玉笥興善石洞諸處選勝尋
幽畱連殆遍見於題咏其佳句如山作登樓色天畱隔
巷陰村煙茅店午籬蝶棘花晴樹懸山雨白門掩佛燈
紅七言如燕子樓臺人影瘦海棠池館月痕孤鳥斷空
山孤樹悄馬嘶小驛一燈昏草意欲供新得句桃花猶
記舊來人風氣百年無舊俗江山滿日記兒時皆高道

古人云

桂隱集

傅若金字與礪新喻人家貧力學爲范樸所知得其詩
法以布衣徵至京名士莫不倒屣虞集宋瑩以異材薦
之佐使安南除廣州文學教授至正三年卒年四十若
金與龔舜咨友善往來栖碧山揭曼碩言予欲賦栖碧
山久矣興無由起一日傅與礪來開卷同賦之予詩未
成與礪已就非不可復作念無可以過與礪也遂易結
語而已

清江集

何中字太虛一字養正臨川人少穎拔師進士張叔方

朱光甫羅士鼎遂以詩名至大初攜所著書來京師公
卿列薦之命未下而歸至順二年江西行省平章全岳
柱聘爲龍興路學宗濂東湖二書院山長明年二月以
疾卒年六十八揭傒斯志其墓所著有知非堂稿外稿
及易類象書傳補遺通鑑綱目測海通書問韻補疑六
書綱領補校六書故友頤錄薊邱述游錄門人潘懋類
聚刊之中往來新淦吟咏風土畱連景物其發金水亭
登太平山由呷步還臨川每著於篇什新城王尙書士
正言中詩工五言近體亦冲澹如聊隨碧溪轉忽與白

鷗逢小雨十數點澹煙三四峯寒沙梅影路微雪酒香
村湖雪殘波岸船燈獨夜人落葉半藏路清風時滿溪
西風一夜雨丹桂滿林花皆有唐賢風味而七律不逮
然新淦呷步作如隔縣販人爭野路迎年姹女試新衣
暖煙黃柳知春到殘雪青山伴客歸亦未嘗不希蹤錢
劉也

知非堂稿

吳澄字幼清撫州崇仁人高祖睦初居咸口里當華蓋
臨川二山間望氣者言其地當出異人澄生三歲穎悟
日發鄉試每前列知用力聖賢之學舉進士不中至元

十三年盜賊蜂起樂安鄭松招澄居布水谷乃著孝經章句校定易書詩春秋儀禮大小戴記侍御史程鉅夫奉詔起澄至京師以母老辭歸未幾除江西儒學副提舉以疾去官至大元年召爲國子監丞諸生以次受業執經問難者踵至澄因材反覆訓誘之俄拜集賢學士英宗卽位遷翰林學士泰定元年初開經筵命澄爲講官會修英宗實錄命總其事書成未上移疾不出請老而歸於易春秋禮記各有纂言精明簡潔卓然一家澄於郡邑之所經由士大夫皆迎請執業淦之境壤密邇撫崇邑之鄧鄒二族爲澄舊交又與淦之詩人劉巨川琴士李天和講論風雅研求音律卽淦之守令去官之日必藉澄一言以爲出身加民之準羣稱爲草廬先生云

元史

周以立字聞孫吉水人至正辛巳領鄉薦明年赴春官中乙榜入史館授鰲峯書院山長以憂去官丙申復就試有司尋擢袁州教授時歐祥據地猖獗大叅全公以書招以立進平袁三策欲署爲從事固辭與季弟維章避亂新淦之石峒著尙書一覽河圖格書序說詩文二

十卷卒年五十四子會早卒以弟之子觀爲嗣觀之子岐鳳官國子學正

解文毅集

郭珏字彥章別號靜思吉水人壯丁元季之亂晚值明興以茂才徵不就經歷艱虞間里流離之狀皆目見之當時故實可裨野史年逾六十以貧死自傷云少壯幾時頭欲白夜闌山鬼瞰孤燈避地新淦題居壁及夜宿西峯云水滿大江舟窅窅塵飛客路馬蕭蕭走淦西永新兵奄至云主翁清曉催人發又報烽煙逼楚臺流離困苦亦可哀矣珏佳句如池浸煖紅花弄影窻涵濕翠竹成科屋前老樹留雲宿竹外茅亭向水安千里鴈聲雲外斷一春花事雨中殘鳶敵高風凝不動鴨分歸路整相排大史未頒周正朔遺民思覩漢衣冠汗馬功名知命薄蠹魚文字謾心勞客行落日凝愁思人隔疎煙聞笑聲急風亂颭蒹葭雪斜日殘明橘柚金皆冷然可

誦 靜思集

明

梁寅字孟敬新喻人世業農家貧力學淹貫五經百氏累舉不第遂棄去辟集賢路儒學訓導居二歲以親老

辭歸天下兵起遂隱居教授太祖定四方徵名儒修述
禮樂寅就徵年六十餘矣時以禮律制度爲三局寅在
禮局中書成將授官以老病辭還居石門從學稱爲石
門先生明石光霽撰寅行狀言楊宗敬謂見寅想明道
先生或曰言大過宗敬曰但以其德性與識趣有過人
者云耳寅與新淦曾得之練伯升周所立以文字相往
還詳石門集其酬得之則曰垂白飽聞經世論酬伯升
則曰名家兄弟昔相親酬所立則曰來訪高賢柳市巾
不但善默以容持身不辱其春風和氣殆所稱太邱道

廣者歎

明史

常遇春字伯仁懷遠人狀貌奇偉勇力絕人猿臂善射
初從劉聚爲盜後歸太祖至正十五年四月也太祖度
江兵薄牛渚磯舟距岸且三丈餘莫能登遇春奮戈直
前乘勢躍上元軍披靡遂拔采石進取太平從徐達取
常州下池州取安慶會師伐漢遇於彭蠡之康山轉戰
三日縱火焚漢舟湖水皆赤漢軍大潰友諒死師還功
最從圍武昌明年太祖卽吳王位進平章政事陳理降
盡取荆湖地從徐達取廬州別將兵畧定臨江之沙坑

麻嶺牛陂諸寨擒僞知州鄧克明遂下吉安圍贛州誅
新淦鄧克明語詳明史何文輝傳史稱開平智勇不在
中山下願中山賞延後裔而開平子孫衰替太祖嘗諭
開平勿妄殺人爾子孫實受其福新淦乃開平駐師斬
將之地其不獲配美於武穆者以此歟太祖之語可爲
將兵之鑑矣

明史

劉永之字仲修清江人父應琦知歸州永之少隨父宦
遊家富於貲未知學過新淦婦翁家時練高早有才譽
永之友壻也翁異視高而庸眾人遇永之永之憤歸就
學治春秋學大進與郡士楊伯謙彭聲之梁孟敬輩講
論風雅當世翕然稱之洪武初徵至金陵以童聽辭歸
子奉獲罪籍其家永之亦徙東萊至桃源病卒其篆隸
行草皆有法所著有山陰集永之與淦守曹仲修善爲
賓客常題邑署夢鶴軒圖又與周所立爲友往來江村
草堂有江淹詞賦白首多才之語蓋皆迭宕跡弛之士
也

山陰集

解縉字太紳吉水人洪武二十一年進士授中書庶吉
士帝稱其才甚見愛重韓國公李善長死縉代郎中王

國用草疏白其寃又爲同官夏長草疏劾都御史袁泰
泰深銜之縉父開入覲帝謂曰以而子歸後十年來大
用未晚也歸八年太祖崩縉入臨京師有司劾縉違旨
謫河南衛吏成祖入擢侍讀預機務高煦譖縉洩禁中
語謫廣西布政司叅議改交陞永樂八年帝北征漢王
言縉伺上出私覲太子逮下詔獄瘐死年四十七縉自
言吾嘗往來蕭峽金川之上弔子雲梅福之遺跡想其
高風而不得見其隱君子與之語及見新淦胡直翁考
其平生之行事無不可對人言者豈不超然子雲梅福

之上耶

解文毅集

羅洪先字達夫吉水人年十五讀王守仁傳習錄好之
舉嘉靖八年進士第一外舅大僕卿曾直喜曰幸吾增
成大名洪先曰儒者事業有大於此者三年一人安足
喜也十八年拜春坊贊善與司諫唐順之校書趙時春
疏請皇太子出御文華殿帝大怒曰是料朕必不起也
遂除三人名歸益求守仁學曰儒者學在經世以無欲
爲本然後識精而力鉅時王畿謂良知自然不假纖毫
力洪先非之曰世豈有現成良知耶雖與畿交好而持

論始終不合山中有石蓮洞默坐一榻三年不出戶隆慶初卒贈光祿少卿謚文莊按夏遊記戊申歲五月下旬王畿期洪先會匡廬登舟至新市邀尹道輿二十七日新淦訪同年吳達湖田饒思聰二十八日泊白馬邀盧虛舟朱周卿六月至豐城返於臨江宿清沂至新淦飲吳雲泉饒湖田所初七日自玉峽趨石蓮洞以近學相質講未發之中二十五日會於青原四方之士至者百六十人發明良知之學七月二十三日解會洪先與達選勝論心令朱陸異同共勤遠志每附商舟月夜抵淦扣達之室疑問思辨以期無乖師商論交之義云

明史叅引羅念庵夏遊記

楊廷麟字伯祥清江人崇正四年進士授編修十年冬皇太子將出閣克講官直經筵京師戒嚴廷麟上疏劾楊嗣昌無禦侮才嗣昌大怒詭薦廷麟知兵改兵部職方司主事叅盧象昇軍象昇戰死廷麟奉使在外十七年都城失守順治二年江寧破江西都郡惟贛州存唐王加廷麟吏部侍郎復吉安臨江加兵部尙書兼東閣大學士三年退保贛州十月四日城破投水死廷麟來

淦常主於陳允衡舅城南別墅與允衡所居僅隔一徑
常語允衡曰今日西銘之書滿家其傳或鮮吳司業書
後出未可量也又曰吾作字便思可以勒石若贈人以
言須考其生平與其所處之友庶無失言之悔又與淦
令陳以運昆季爲同年友時相投贈云

參引明史

國朝

王士正字貽上山東新城人康熙乙未進士丁酉游歷
下集諸名士於明湖賦秋柳詩四方和者數百人謁選
得揚州推官日了公事夜接詞人結冶春詩社入爲禮

部遷戶部福建司郎中戊午奉

旨召對改侍講轉侍讀學士遷國子祭酒補詹事府甲子奉

命祭告南海遊白鹿洞登廬山由南昌溯豐城信宿新淦愛皂

嶺諸峯以爲青在九華之上有新淦道中諸作

精華錄

查慎行字夏重浙江海寧人康熙癸未進士授翰林院

編修入值

南書房瀛臺

召對賞花釣魚進

呈詩有雨襟風笠平生夢臣本煙波一釣徒之句稱

旨轉侍讀學士丙申致仕丁酉赴嶺南開府佟公法海之招道
出新淦夜宿泥江口賦枕上聞鴈詩 敬業堂集

黃慎字恭懋號瘦瓢福建寧化人年十二父巨山歿於
楚慎哀痛屏當資裝迎柩以歸奉母盡孝家貧無以爲
生遂學畫十八九歲寄僧寺畫爲畫夜無所得燭從佛
光明燈下憬然有悟與遊多聞人復工詩善草書而畫
遂擅國能有句云愛看古廟破苔痕慣寫荒崖亂樹根
畫到神情飄沒處更無真相有真魂出遊豫章歷吳越
揚州桂林陳宏謀官於吳重其人益喜其詩畫慎來淦

富家巨室咸邀致之蕭寺留題更夥淦人習經受其指
法善人物花卉作一筆石尤爲佳絕 王巳山文集

讚曰駢駢征夫不尚惕焉東吳各士南交重遷文公之
來武穆其先

皇華紀聞兼采新篇

...

...

...

...

...

...

...

